

Date – 02/11/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Home Minister Pu K. Sapdanga chuan football chu infiamna chauh ni loin, eizawnna leh taksa hriselna a ni tel tih a sawi.
2. Lawngtlai District Legal Services Authority bul tumin, nimin khan District Legal Services Committee an thu khawm.
3. Thingtlanga kuthnathawktu hmeichhiate tharchhuah zawrhna SARAS Fair vawi – 11-na leh SHG Mela SARAS FAIR leh SHG MELA 2025 chu nizan khan a tawp a, ni 4 chhungin cheng nuai 54, sing 3, sang 5 chuang man hralh chhuah a ni.
4. Defence Minister Rajnath Singh chuan Kuala Lumpur, Malaysia-a hman mek ASEAN - Defence Ministers Meeting Plus chu India ‘Act East Policy’ leh ‘Indo - Pacific Vision tana hmanraw pawimawh tak a nih thu a sawi.

<><><>

HOME MINISTER

Home Minister Pu K. Sapdanga chuan football chu infiamna chauh ni loin, eizawnna leh taksa hriselna a ni tel tih a sawi.

Mizoram chhunga football inelna lian leh sang ber Mizoram Premier League 2025 chu nizan khan Mualpuia Rajiv Gandhi Stadium-ah khelh zawh a ni a, Chanmari FC chuan P Christopher Kamei-a goal khat khung hmangin Aizawl FC chu si khat faiin an hneh a, an champion ta a ni.

Pu K. Sapdanga chuan Chanmari FC lawmpuina thu chu social media kaltlanga sawiin, Mizorama Football inelna sang ber Mizoram Premier League 2025-ah Chanmari FC an Champion chu thinlung takin a lawmpui tih a sawi a. Football chu infiamna a ni satliah lo a, eizawnna leh taksa hriselna a ni tel tih sawiin Mizo thalai tam takin football hmangin eizawnna an nei mek zel a ni, a ti bawk.

Home Minister chuan MPL chu India rama inelna lian leh sang zawk khel turte tan kailawn tha tak a ni tih a sawi a, tun aia nasa lehzual a hmasawn tur pawhin a duhsak thu a sawi bawk a ni.

(Mizoram Premier League khelh zawh takah hian mimal lawmman hrang hrang sem chhuah a ni a, Chanmari FC rawlthar F. Malsawmtluanga chu Emerging Player atan thlan niin, Chanmari FC goalkeeper T Zothanmawia chu si ban nghaktu tha ber leh Best Player atan an thlang. Aizawl FC player pathum - Rohmingthanga,

Lalawmpuia Sailo leh Zomuansanga te chuan Best Defender, Best Midfielder leh Best Forward bakah Top Scorer chawimawina an dawng bawk.)

<><><>

LEGAL SERVICES

Lawngtlai District Legal Services Authority bul tumin, nimin khan District Legal Services Committee an thu khawm a, District Legal Service Authority, Lawngtlai atanga victim compensation dilna lut te an ngaihtuah a, dilna lut 17 atangin case 10 chu compensation pek tur an thlang fel.

DC conference hall-a hun hman hi District & Session Judge leh Lawngtlai DLSA Chairman ni bawk Pi R. Vanlalchami chuan meeting hi kaihruaiin, Secretary DLSA Lawngtlai Pi Zothansangi Tlau in dilna lut 17 te pharhin a sawifiah a. Case tin te hi ngun taka ngaihtuah a sawi ho a nih hnuaiah case 10 chu The Mizoram victim of crime compensation scheme 2016 hnuaiah victim compensation dawng turin an thlang fel a, District Legal Services Committee in crime compensation hmutura an remtih te hmuhtur hi a vaiin cheng nuai 56 a ni.

Meeting-ah hian District Legal Services comittee member, Deputy Comissioner Lawngtlai aiawh leh Superintendent of Police Lawngtlai aiawh te bakah Judicial Magistrate First Class Pu C. Lalremsanga, Assistant Public Prosecutor Pu C. Lalbiakkima, Pi C. Lalrinkimi President Lai Women Association (LWA) leh Central YLA aiawhin Pu Eden Lalrammawia Chinzah Finance secretary, Central YLA te an tel a ni.

The Mizoram victim of crime compensation scheme,2016 hnuaiah hian pawl khawihna rapthlak tuartu nunna chan te leh taksa leh rilru lama rualbanlohna thlen phah khawp hial a pawl khawihna tuartu te hnenah zangnadawmna hi pek thin niin, DLSA Office Lawngtlai ah dilna hi thehluh thin a ni.

<><><>

SARAS FAIR

Thingtlanga kuthnathawktu hmeichhiate tharchhuah zawrhna SARAS Fair wawi – 11-na leh SHG Mela SARAS FAIR leh SHG MELA 2025 chu nizan khan a tawp a, ni 4 chhungin cheng nuai 54, sing 3, sang 5 chuang man hralh chhuah a ni.

Akashvani News Aizawl zawhna chhangin, DAY-NULM Manager Gudhi Singh chuan Urban leh Rural an inthen hrang tih sawiin, Urban chuan District 11 huamin Thawhlelni atanga SARAS FAIR leh SHG MELA 2025 an neih chhung hian an in hralh tha hle a ti a, a hawn ni khan Urban area atanga thil zuarte chuan cheng nuai 3, sing 8, sang 5 man an hralh a, a tuk Nilainiah cheng nuai 5, sing 5 man hralh lehin, Ningani khan cheng nuai sing 7, sang 4 chuang man an hralh leh a, Zirtawpni kha an hralh tam ber ni niin cheng nuai 10, sing 1, sang 3 man an hralh tih sawiin, nimin pawh a khar ni a nih bakah chawlh a ni a, concert te a awm bawk avangin mipui an tam tih a sawi bawk.

MzSRLM CEO Pi Zosangzuali Pachuau chuan thingtlang khaw hrang hrang 71 atanga nu 98 te chuan stall 52 hawngin an thil siamchhuah leh an thar chhuah te an zuar a, an rin phakbak a an inhralh that thu sawiin mi tam tak tan hlawkna a thlen

dawn a ti a, Lungleiah pawh SARAS buatsaih leh an tum mek tih sawiin mipuite chu hlut sak leh turin a sawm a ni.

Kumina a vawi 11-na atan Lammual Ground, Aizawlah UD&PA nena tangkawpin, MzSRLM leh MzSULM hnuai a SHG te ten SARAS Fair & SHG Mela an buatsaihah hian hian Stall – 102 bakah Food Stall- 8 buatsaih a ni a. Heng zingah hian MzSRLM hnuai Block 28 chhung a khaw 71 atangin SHG member 98 ten Stall-52 leh Food Stall-2 an nei a ni.

<><><>

PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn.

Akashvani Aizawl Regional News Unit chuan PTC tur hi Aizawl, Hnahtial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, 2025 thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani dawn a, AIR News Aizawl Facebook page ah download theihin a awm baw ang.

Hrechiang duh tan AIR News Aizawl Social media page ah leh phone number 8131823773 ah zawhfiah theih a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

KENDRIYA GRIHMANTRIPADAK

Ministry of Home Affairs chuan tun hnai khan India rama police chawimawina sang ‘Kendriya Grihmantri Dakshata Padak’ dawng tur list a tichhuak a, hming tih chhuah zingah hian Sub Inspector Samuel Lalramenkima, Kanhmun Police Station a OC thin, tuna Marpara PS OC nimek chu a tel.

SI Samuel Lalramenkima hian kumin February ni 13-a Bungthuama Lalfakmawia (kum 59) thihna chungchanga mawhphurtu mi pariatte a man vek avangin chawimawina hi a dawng dawn a ni.

Lalfakmawia (59) hi kumin February ni 13 khan Bungthuam leh Luimawi luiah thiin hmuh a ni a, kekawrte leh t-shirt chauh hain, a nghawngah gamchha a insuih bakah a lu-ah tuboh hmanga chhutna hmun ngaah a awm baw. Kanhmun Police Station-ah thubuai ziahluh niin he tualthihnaa inhnamhnawih a nupui

Sondorung Reang leh a thurualpui Mizo pakhat bakah bru parukte chu an man vek a ni.

<><><>

Defence Minister

Defence Minister Rajnath Singh chuan Kuala Lumpur, Malaysia-a hman mek ASEAN - Defence Ministers Meeting Plus chu India ‘Act East Policy’ leh ‘Indo - Pacific Vision’ tana hmanraw pawimawh tak a nih thu a sawi.

He thu hi Defence Minister Rajnath Singh chuan ADMM - Plus thutkhawm vawi 12-na Kuala Lumpur, Malaysia a neih ah sawiin India leh ASEAN ramte chu ram venhimna kawnga an thawh that a pawimawh thu a sawi a. ADMM - Plus chu India ram Act East Policy leh Indo-Pacific vision zau zawka a tel ve theih nana pawimawh tak a nih thu sawiin, ASEAN ramte nen venhimna thawhhona kawngah India chu a in peih reng tih a sawi bawk.

<><><>